



ES KÄSCHPERLET

Herreinschpaziert, herreinschpaziert,
s gross Wälttheater isch do,
kemmet iine, hogget aane, dr Käscherli isch ko.
Unser Theaterli spiilt uff dr ganze Wält,
mer käscherle um d Macht und vyl Gäld.

Feemer znäggscht doch grad in Basel aa,
do kunnt as Käscherli dä syydig Ey(er)maa,
dä het sy Sässel wie s Byysiwätter ergaddered,
em Spezi HaMaTschu hänn nur so d Leffel gfladdered.

Do het s Baudebb Babsy vor Schräge läär gschluggt,
me het dämm Prinzässli nämlig e 2 uff e Rugge druggt,
derzue aane het dä Käscherli in d Luft uuse ballered,
und eso dr beesi Drache in d Wieschi gschallered.

S näggschte Schtiggli, ych sag das no gäärn,
schpiilt nit z Basel, aber z Bäärn.
Dert het soone Käscherli sy Bindeli aanegleggt,
dr Zauberer Blocher isch driiber vor Fraid fasch ver-

Äändlig ka äär syynere Prinzässin, däre blonde, dolle,
e Bundesrootsdron vor d Fiess ane rolle.
Trotz allem Käscherle goot das aaber in d Hoose,
e Bärnergrind het das Schätzli uff Ziiri zugg bloose.

S greeschte Käscherlitheater spiilt äänen am Dyych
im groose Wältpolizishte Ryych,
das Land wo allne wott e Byschpiil sii
lauft sälber gopferdeggel drii.

Deert sait dr Käschi Billy zer Hilly: «Muesch guet
loose,
ych ha ändgiltig gnueg vom ummenander bloose,
y schpiil drumm my Saxophon nur no dehai,
regiere duesch Duu jetze, aber in New York und ellai.»

Druffaabe duet me alle Yankee demograatisch bifääle,
si solle gfelligscht e neye Käscherli go wääle,
äntwääder e Texas Cowboy, wo nit uff 3 ka zelle,
oder dr Vizepreesi, sone diegfroorene
Subberintellegtuelle.

Im ganze Land wird jetze um e jeedi Stimm gworbe,
denn nur dr ainti siigi guet, dr anderi saumässig verdor-
be,
am Färnsee hängge si enander alli Schletterlig a,
me sait dämm Demokratii deert ääne, deert z Amerika.

Am Waaldaag het mes ändlig welle erfaare,
wär dr Ney wird sii vorem Regierungskaare.
Si dien drum gly aafoo, mit dämm Stimme zelle,
si zelle, zelle und zelle und zelle, hänn nimme heere

Wo d Bschäärig äntlig uss isch ko,
steen die baide Käscherli wie Duuble do,
denns Volgg het kaine usserkoore,
e jede het sy Waal verloore.

Jetze foot e ryysige Speggdaggel a,
well jede dr Syyg im aigene Sagg wott ha,
ganz Amerika schpanyyflod mit und findets schigg,
dääwääg wird us dämm Land e Banaanerepubligg.

Zerscht dien si noonemool Stimme zelle,
denn sueche si uff de Zeedle an alle Stelle,
obs nit vilicht oder wäägerli halt nit,
no naime e Leechli vonere Waalmaschiine git.

Doch au daas het kai Sääge brocht,
drumm sin die 2 Käscherli e Stueffe heecher blocht,
Zem Kaadi vor d Schmitti sin si mitenand,
jetz soll däa saage, wär Ooberjehuudi wird im Land.

Druffaabe dien d Grichtsbrofeete sich hailoos schinde,
well si ummsverregge mien e Leesig finde.
Am Andi expliziere die: «Jetz isch aaber Schluss,
sigg sagg sugg und duu bisch duss!»